

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ԶՈՒՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ
P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Է. Տարի, Թիւ 285, Ուրբաթ, 29 ՄԱՅԻՍ, 2015

ԼՈՒՐԵՐ ԱՆԹԻԼԻՍՄԻ ԿԱԹՈՂԻԿՈՍԱՐԱՆԷՆ

ՎԵՐՋԻՆ ՕԾՈՒՄ ԵՒ ԹԱՂՈՒՄ ՀՈԳԵԼՈՅՍ Տ. ԿՈՐԻՒՆ Ս. ԱՐՔ. ՊԱՊԵԱՆԻ



Շաբաթ, 23 Մայիս 2015-ին, Մեծի Տանն Կիլիկիոյ Կաթողիկոսութիւնը գլխաւորութեամբ Գերշ. Տ. Եփրեմ Արք. Թապազեանի ու մասնակցութեամբ միաբան հայրերուն, ժողովական կառոյցներու ներկայացուցիչներուն եւ հաւատացեալ ժողովուրդին, հրաժեշտ տուաւ Կիլիկեան Ուխտի երիցագոյն միաբաններէն, անձնուէր ու հաւատարիմ հոգեւորականին, հմուտ հայագետին, ծիսագետին, աստուածաբանին եւ Տնօրէն Ժողովի ատենապետ՝ Տ. Կորիւն Ս. Արք. Պապեանին:

Առաւօտուն, միաբան հայրերուն եւ հաւատացեալ ժողովուրդին մասնակցութեամբ Գերշ Տ. Շահան Արք. Սարգիսեան մատուցեց Սուրբ եւ Անմահ Պատարագ: Յընթացս Սուրբ Պատարագին, հանգուցեալ Սրբազան Հօր դագաղը միաբան հայրերուն կողմէ Տաճարի Ատենակէն բերուեցաւ Ս. Խորան, ուր տեղի ունեցաւ

Վերջին Օծման Կարգը, ձեռամբ Գերշ. Տ. Եփրեմ Արք. Թապազեանի եւ մասնակցութեամբ միաբան հայրերու:

Եկեղեցիէն, իր հոգեւոր եղբայրներէն եւ բարեպաշտ ժողովուրդէն հրաժեշտ առնելու հոգեթով շարականներու երգեցողութեան ընթացքին, հանգուցեալ Սրբազան Հօր դագաղը հերթաբար դէպի Արեւմուտք, Արեւելք ու Հարաւակողմ դարձուեցաւ, որմէ ետք Եփրեմ Սրբազան Սրբալոյս Միւռնոնով օծեց հանգուցեալ Սրբազան Հօր ճակատն ու աջը եւ ընթերցեց այս առիթով գրուած Ն.Ս.Օ.Տ.Տ. Արամ Ա. Կաթողիկոսին գրած դամբանականը, ուր Վեհափառ Հայրապետը հետեւեալ չորս կէտերով կը բնութագրէ հանգուցեալ Սրբազան Հայրը.-



«Ա) Կորին Սրբազան եղաւ Աստուծոյ, մեր եկեղեցոյ ու ժողովուրդին նուիրեալ ծառան, բառին վաւերական հասկացողութեամբ: Հոգեւորականի կեանքին ճամբան ու նպատակը ծառայութիւնն է: Հոգեւորականի կեանքին ու գործին արժեչափը դարձեալ ծառայութիւնն է: Այս գիտակից յանձնառութեամբ Կորին Սրբազան, որպէս Աստուծոյ ծառայութեան ուխտը կատարած հոգեւորական իր կեանքը ապրեցաւ մեր եկեղեցոյ համայնական կեանքէն ներս:

Բ) Կորին Սրբազան եղաւ ու մինչեւ իր կեանքին վերջին րոպէն մնաց մտաւորական: Գիրքն ու գիրը իր կեանքէն անբաժան մնացին՝ նոյնիսկ հիւանդութեամբ վարակուած վերջին ամիսներուն: Հանգուցեալ Սրբազանը ո՛չ միայն գիրն ու գիրքը սիրողը եղաւ, այլ նաեւ իր պատանեկան օրերէն սկսեալ գեղարուեստական գրականութեան բնագաւառէն ներս մուտք գործեց եւ աւելի հասուն տարիներուն՝ բանասիրական կալուածէն:

Գ) Կորին Սրբազանը եղաւ ու մնաց հաճելի ու սիրելի անձ մը իր շրջապատին: Ստանձնած բոլոր պաշտօններուն ընթացքին, կեանքի ուրախ թէ տխուր պայմաններուն զուարթախօսութիւնը միշտ մնաց տիրական ներկայութիւն՝ նոյնիսկ իր երկրաւոր կեանքի վերջին օրերուն: Հաճելի էր զինք լսել երբ ան գրական պատկերներով ու դարձուածքներով դէպքերն ու հարցերը կը ներկայացնէր անձնական խօսակցութեան թէ հրապարակային ելոյթներու ընթացքին:



Դ) Կորին Սրբազան եղաւ ու մնաց հաւատարիմ միաբան Մեծի Տանն Կիլիկիոյ Կաթողիկոսութեան: Ան մեր Սուրբ Աթոռին ծառայեց Երջանկայիշատակ Զարեհ, Խորէն եւ Գարեգին Վեհափառ Հայրապետներու գահակալութեան շրջաններուն: Պատկանելով մեր միաբանութեան երեց սերունդին, ան ապրեցաւ մեր Սուրբ Աթոռին ուրախ թէ տազնապալից օրերը՝ բոլոր պայմաններուն մէջ մնալով հնազանդ Վեհափառներուն ու հաւատարիմ Մեծի Տանն Կիլիկիոյ Կաթողիկոսութեան սկզբունքներուն»:

Այնուհետեւ, միաբան հայրերը խորան բարձրացան ու երկիւղածութեամբ համբուրեցին հոգեւոյս Սրբազանին օծեալ ճակատն ու աջը: Սուրբ եւ Անմահ Պատարագէն անմիջապէս ետք, միաբան հայրեր դագաղը ուսամբարձ առաջնորդեցին Զարեհեան Յուշարձան-Դամբարան, ուր տեղի ունեցաւ Գերեզմանի Կարգը: Ապա, միաբան հայրեր հանգուցեալ Սրբազան Հօր դագաղը իջեցուցին իր վերջին հանգստարանը՝ Կիլիկեան Ուխտի միաբանական դամբարան, ուր Գերպ. Տ. Վաղինակ Ծ. Վրդ. Մելոյեանի գլխաւորութեամբ տեղի ունեցաւ հողի օրհնութիւնն ու գերեզմանի կնքումի արարողութիւնը:

Յայտնենք, որ Հինգշաբթի, 21 Մայիս 2015-ին, Արամ Ա. Կաթողիկոսի նախագահութեամբ, Հոգեւոյս Սրբազանին հոգւոյն համար հոգեհանգստեան պաշտօնական արարողութիւն կատարուեցաւ Տիբրոյթի Ս. Սարգիս եկեղեցոյ մէջ: Յիշատակն արդարոյն օրհնութեամբ եղիցի:

ՀԱՅԿԱԿԱՆ

Ասատ. «Այն Տառապանքը, Չոր Պատմութեան Մէջ Հայերը Ապրեցան, Այսօր Սուրիան Կ'ապրի՝ Սպանութեան Ու Ահաբեկչութեան Նոյն Գործիքներով, Սակայն Տարբեր Ձեռով Ու Նպատակի Համար»

Հայաստանի Հանրապետութեան արտաքին գործոց նախարար Էդուարդ Նալբանդեան Չորեքշաբթի օր՝ 27 Մայիսին, Պէրութէն մեկնեցաւ Դամասկոս, ուր հանդիպում ունեցաւ Սուրիոյ նախագահ Պաշշար Ասատի եւ արտաքին գործոց նախարար Ուալիտ Մոալլեմի հետ:



Սուրիական ՍԱՆԱ լրատու գործակալութեան համաձայն, հանդիպման ընթացքին կողմերը շեշտեցին Սուրիոյ եւ Հայաստանի միջեւ խոր արմատներ ունեցող պատմական յարաբերութիւններու կարեւորութիւնը եւ ընդգծեցին անոնց ամրապնդման անհրաժեշտութիւնը՝ ի շահ երկու երկիրներուն եւ տարածաշրջանին: Սուրիոյ նախագահը դիտել տուաւ, որ Հայաստանի կարեւոր դեր վերապահուած է ահաբեկչութեան դէմ պայքարին մէջ, նաեւ ընդգծեց տարածաշրջանի իրական պատկերը արեւմտեան երկիրներուն ներկայացնելու անհրաժեշտութիւնը:

Ասատ Նալբանդեանի հետ իր հանդիպումին ընթացքին նշեց. «Այն տառապանքը, զոր սպանութեան մէջ հայ ժողովուրդը ապրեցաւ, այժմ սուրիացիներու բոլոր հատուածները կ'ապրին՝ սպանութեան ու ահաբեկչութեան նոյն գործիքներով, սակայն տարբեր ձեռով ու նպատակի համար»:

Ասատ յայտնեց. «Հայաստանի կառավարութիւնը կրնայ կարեւոր դերակատարութիւն ունենալ տարածաշրջանի ժողովուրդներուն դիմագրաւած ներկայ դժուար պայմաններուն մէջ»:



Ան դիտել տուաւ, որ Թուրքիա վտանգաւոր դեր կը խաղայ՝ նշելով, որ միջազգային հանրութիւնը պէտք է ճնշում բանեցնէ Թուրքիոյ վրայ՝ դադրեցնելու իր սպակառուցողական գործողութիւնները: Իր կարգին, Էդուարդ Նալբանդեան դատապարտեց սուրիացիներուն դէմ ահաբեկչական գործողութիւնները՝ նշելով, որ սպառնալիքը կը պահանջէ միասնական եւ լուրջ ջանքեր ի գործ դնել՝ ահաբեկչութեան դէմ պայքարելու համար:

Նալբանդեան նաեւ հանդիպում ունեցաւ սուրիացի իր պաշտօնակիցին՝ Ուալիտ Մոալլեմի հետ, որ միացեալ մամլոյ ասուլիսին ընթացքին յայտնեց, որ սուրիացի ժողովուրդը

կարողութիւնը ունի դիմադրելու «սուրիական հայրենիքը մասնատելու որեւէ փորձի»՝ աւելցնելով. «Սուրիոյ դէմ դաւ նիւթող երկիրները յայտնի են՝ անոնք են Սէուտական Արաբիան, Յորդանանը, Քաթարը եւ Թուրքիան»:

Մտալլեմ ըսաւ. «Եթէ նախապէս հայերուն դէմ ջարդեր գործած մարդասպանները դատուէին, ատիկա չէր կրկնուեր, եւ այսօր Թուրքիոյ մէջ անոնց թոռները չէին համարձակէր Սուրիոյ մէջ իրենց գործիքներուն ճամբով ջարդեր գործելու»՝ հարց տալով. «Միջազգային ընտանիքը նոր ջարդարարներուն ի՞նչ կ'ընէ»:

Նալբանդեան իր կարգին յայտնեց, որ Սուրիոյ մէջ ճգնաժամը կարելի է յաղթահարել միայն բռնարարքներու դադրեցման եւ սուրիական տարբեր հաստատման միջեւ երկխօսութեան ճամբով՝ ինչ որ բոլոր սուրիացիներուն շահերը կ'ապահովէ:

«Սուրիոյ մէջ քաղաքայիններուն, ներառեալ փոքրամասնութեանց կացութիւնը մեզի համար մնայուն հետաքրքրութեան կիզակէտ է», ըսաւ ան եւ սուրիական իշխանութիւններուն երախտագիտութիւն յայտնեց՝ հայկական ժառանգութեան ու աւանդութեան նկատմամբ ցուցաբերած հոգատարութեան համար:

Հայաստանի արտաքին գործոց նախարարը յայտնեց, որ այս այցելութիւնը կը կատարուի խորհրդանշական թուականի՝ Հայոց ցեղասպանութեան 100-ամեակին: Ան ըսաւ, որ 100 տարի առաջ սուրիական անապատները դարձան Ցեղասպանութեան հարիւր հազարաւոր զոհերու վերջին հանգրուանը, իսկ սուրիացի ժողովուրդը օգնութեան ձեռք մեկնեց անոնց, Սուրիան դարձաւ ապաստան եւ երկրորդ հայրենիք:

Նալբանդեան նշեց, որ Հայոց ցեղասպանութեան 100-ամեակի նշանաբանն էր «Այլեւս երբեք», եւ Հայաստան միջազգային ընտանիքին մէջ մեծ ջանք ի գործ կը դնէ աշխարհի տարածքին ցեղասպանութիւններու կանխարգիլման համար:

Ան յայտնեց, որ միջազգային ընտանիքը սկսած է գիտակցիլ, որ որոշումներու որդեգրումը միայն բաւարար չէ, այլ այդ չարիքի կրկնութիւնը կանխարգիլելու համար պէտք է հարկ եղած քայլերը որդեգրել:

Սպանական Սանթա Մարկարիթան Պաշտօնապէս Ճանչցած Է Հայոց Ցեղասպանութիւնը



Սպանիոյ մէջ Հայաստանի դեսպանատունը կը տեղեկացնէ, որ Սանթա Մարկարիթան միացած է Հայոց ցեղասպանութիւնը պաշտօնապէս ճանչցած սպանական քաղաքներուն:

«Սանթա Մարկարիթայի քաղաքապետարանը որոշած է աջակցութիւն ցուցաբերել, որպէսզի ճանչցուի Հայոց ցեղասպանութիւնը եւ պահանջուի փոխհատուցում, պահանջել Սպանիոյ կառավարութենէն այդ Ցեղասպանութեան

ճանաչումը եւ կազմակերպել այս որոշման փոխանցումը միջազգային կառոյցներուն», նշուած է քաղաքապետարանի որոշումին մէջ:

Տեղի Ունեցաւ Լրագրողներու Համահայկական Համաժողովները Համակարգող Մարմինի Նիստ

26 Մայիսին տեղի ունեցաւ Լրագրողներու համահայկական համաժողովները համակարգող մարմինի նիստը, որուն մասնակցեցաւ Հայաստանի Հանրապետութեան սփիւռքի նախարար Հրանուշ Յակոբեան: Նիստը կը վարէր Համակարգող մարմինի նախագահ, «Ազդակ» օրաթերթի տնօրէն եւ գլխաւոր խմբագիր Շահան Գանտահարեան:

Նիստին կը մասնակցէին սփիւռքի փոխնախարար Սերժ Մրապիոնեան, Հայաստանի լրագրողներու միութեան նախագահ Աստղիկ Գեորգեան, Լրատուամիջոցներու համահայկական ընկերակցութեան նախագահ Տիգրան Յարութիւնեան, Երեւանի պետական համալսարանի լրագրողներու բաժանմունքի վարիչ Նաղաշ Մարտիրոսեան, Երեւանի պետական համալսարանի լրագրողներու բաժանմունքի դասախօս Աստղիկ Աւետիսեան, սփիւռքի նախարարի մամլոյ քարտուղար Սէրապիոսի Գեղամեան, սփիւռքի նախարարութեան տեղեկատուութեան եւ հեռահաղորդակցութեան վարչութեան պետ Վաղինակ Վարդանեան, սփիւռքի նախարարութեան աշխատակազմի մամլոյ եւ հասարակութեան հետ կապերու վարչութեան պետ Էվելինա Բաղդասարեան:



Նիստին հեռակապով միացած էին նաեւ Սպանիայէն Արթիւր Ղուկասեան, Միացեալ Նահանգներէն Յակոբ Վարդիվառեան, Արցախէն Կիմ Գաբրիէլեան, Թեհրանէն Դերենիկ Մելիքեան, Լիբանանէն Սեւակ Յակոբեան եւ Համբիկ Մարտիրոսեան:

Նիստը քննեց ապրիլ 2015-ին լրատուամիջոցներուն անդրադարձը Հայոց ցեղասպանութեան ձեռնարկներուն վերաբերեալ, ինչպէս նաեւ այդ ձեռնարկներուն մասին տեղ գտած արձագանգը: Նոյն օրակարգով, ժողովը անդրադարձաւ նաեւ այս տարուան ընթացքին հայկական լրատուամիջոցներուն կատարելիք աշխատանքներուն: Ժողովականները քննարկեցին նաեւ այս տարուան ընթացքին տեղի ունենալիք լրագրողներու ամառնային դպրոցին մանրամասնութիւնները: Անոնք անդրադարձան 2016-ին տեղի ունենալիք Լրագրողներու համահայկական 8-րդ համաժողովի նախապատրաստական աշխատանքներուն:

Նախարար Նալբանդեանի Հանդիպումը Լիբանանահայութեան Ներկայացուցիչներուն Հետ

26 Մայիսի երեկոյեան, Հայաստանի Հանրապետութեան արտաքին գործոց նախարար Էդուարդ Նալբանդեան այցելեց Լիբանանի մէջ Հայաստանի Հանրապետութեան դեսպանատուն, ուր հանդիպում ունեցաւ Լիբանանի հայ համայնքի կառոյցներու ներկայացուցիչներուն հետ: Հանդիպումին ընթացքին նախարար Նալբանդեան իր կողմէ կատարուած զեկուցական մը ներկայացնելէ ետք պատասխանեց լիբանանահայութիւնը յուզող բազմաթիւ հարցումներու:

Աւարտելով Լիբանան այցելութիւնը՝ Հայաստանի Հանրապետութեան արտաքին գործոց նախարարը ուղղուեցաւ Դամասկոս:

Սահակեան Տեսակցեցաւ Քանատայի Խորհրդարանի Նախագահին Հետ

Հայաստանի Հանրապետութեան Ազգային ժողովի նախագահի գլխաւորած պատուիրակութիւնը Քանատայի խորհրդարանին մէջ Չորեքշաբթի օր տեսակցեցաւ Քանատայի Համայնքներու տան նախագահ Էնտրիւ Շիրի հետ:

Գալուստ Սահակեան վստահեցուց, որ Հայաստան մեծ նշանակութիւն կու տայ հայ-քանատական միջխորհրդարանական յարաբերութիւններու զարգացման՝ իբրեւ միջպետական յարաբերութիւններու կարեւոր տարր:

Խօսելով Հայոց ցեղասպանութեան 100-ամեակի ծիրին մէջ իրականացուած ձեռնարկներուն եւ Քանատայի՝ այդ ձեռնարկներուն մասնակցելու մասին՝ Գալուստ Սահակեան նշեց, որ ասիկա հայ ժողովուրդին եւ միջազգային հանրութեան համար կարեւոր է ոչ միայն անգամ մը եւս պատմական փաստերը բարձրաձայնելու, այլեւ նման յանցագործութիւններուն «այլեւ երբեք» ըսելու առումով:



Գալուստ Սահակեան իր երախտագիտութեան խօսքը յայտնեց Քանատայի Համայնքներու տան նախագահին՝ ապրիլի 24-ը Քանատայի մէջ Հայոց ցեղասպանութեան օր հռչակող բանաձեւին ընդունման համար:

Էնտրիւ Շիր շնորհակալութիւն յայտնեց հայկական պատուիրակութեան Քանատա այցելութեան համար եւ նշեց, որ կարեւոր կը նկատէ նման հանդիպումները պաշտօնատարներու միջեւ: «Համագործակցութիւնը կը զարգանայ նման հանդիպումներով եւ երկխօսութեամբ», ըսաւ ան:

Հայաստանի Հանրապետութեան Ազգային ժողովի նախագահի գլխաւորած պատուիրակութեան կազմին մէջ են պատգամաւորներ Վահրամ Պաղտասարեան, Յովհաննէս Սահակեան, Ռուզաննա Մուրատեան, Արտակ Զաքարեան, Թեւան Պօղոսեան, Իշխան Խաչատրեան, Հրանդ Բագրատեան, Լիովա Խաչատրեան եւ Աղուան Վարդանեան:

Պաշտօնական այցելութեան ծիրին մէջ պատուիրակութիւնը նաեւ տեսակցեցաւ Ֆրանսախօս երկիրներու միջազգային կազմակերպութեան խորհրդարանական վեհաժողովի քանատական գործադիր խորհուրդի անդամներուն հետ: Հանդիպման ընթացքին խօսուեցաւ Հայաստանի՝ Ֆրանսախօս երկիրներու խորհրդարանական վեհաժողովին լիիրաւ անդամակցութեան մասին, որ ձեռք բերուած է վերջերս նաեւ քանատական կողմի աջակցութեամբ: Քննարկուեցաւ նաեւ հոկտեմբեր 2015-ին Երեւանի մէջ նախատեսուող Ֆրանսախօս երկիրներու միջազգային կազմակերպութեան արտաքին գործոց նախարարներու խորհուրդի կայացման հարցը:

Զրուցակիցները խօսեցան Քանատայի հայկական գաղութին մասին, որ ըստ քանատական կողմին, օրինակելի է եւ մեծ ներդրում ունի երկրին մէջ տարբեր ծրագիրներու իրականացման գործին մէջ:

ՄԻՋԱԶԳԱՅԻՆ

**«Սուրիա Եւ Իրաք Մասնատման Վտանգը Կը
Դիմագրաւեն, Եթէ Միջազգային Դաշինքը Շուտով
Չամրապնդուի» Կը Զգուշացնէ Ֆապիւս**

«Ռոյթըրըզ» լրատու գործակալութիւնը կը հաղորդէ, որ Ֆրանսայի արտաքին գործոց նախարար Լորան Ֆապիւս Չորեքշաբթի օր յայտարարած է, թէ Սուրիոյ եւ Իրաքի մէջ ՏԱՀԵՇ-ի դէմ կոտուող միջազգային դաշինքը կարիքը ունի շուտով ամրապնդուելու՝ կանխարգիլելու համար յաւելեալ ջարդերն ու երկու երկիրներուն մասնատումը:

Ան նաեւ քննադատեց իրաքեան կառավարութիւնը՝ ըսելով, որ Ֆրանսա անցեալ տարի ՏԱՀԵՇ-ի դէմ օդային հարուածներ հասցնել որոշած էր այն հիմամբ, որ Պաղտատ աւելի ներառող կառավարութիւն մը կազմէ: «Այս համաձայնագիրն է, որ կ'արդարացնէ մեր զինուորական մասնակցութիւնը, եւ այստեղ յստակ կերպով պիտի ըսեմ, որ ստիկա աւելի լաւ կերպով պետք է յարգուի», ըսած է Ֆապիւս:

Յայտնենք, որ Ֆրանսա 2 Յունիսին Փարիզի մէջ կը հիւրընկալէ 24 երկիրներու մասնակցութեամբ վեհաժողով մը՝ քննարկելու համար ՏԱՀԵՇ-ի դէմ ամերիկեան ղեկավարութեամբ դաշնակից ուժերու ռազմավարութիւնը:

**Իրաքի Միացեալ Հրամանատարութիւնը
Կը Յայտարարէ Անպար Նահանգի
Ազատագրման Գործողութեան Սկիզբը**

Իրաքի միացեալ հրամանատարութիւնը յայտարարեց, որ Անպար նահանգը ՏԱՀԵՇ-ի բռնագրաւումէն ազատագրելու գործողութիւնը ընթացք առած է:

Անպար նահանգի խորհուրդի անդամ Ազալ Ֆահտաուի յայտարարեց, որ ապահովական մարմինները փակած են Ռամատիի հարաւը ՏԱՀԵՇ-ի մատակարարման բոլոր ճամբաները՝ աւելցնելով, որ զինեալ խմբաւորումները կը շարունակեն հաւաքուիլ Հուսէյպա Շարքիյա շրջանին մէջ՝ առ ի պատրաստութիւն Ռամատիի ազատագրման: Ան ըսաւ, որ ապահովական ուժերը թիւ 35 շրջան հասած են Ռամատիի արեւմուտքը գտնուող ռազմավարական ճամբուն միջոցով եւ կտրած Ռամատիի հարաւէն մատակարարման ՏԱՀԵՇ-ի գիծերը:

Ֆահտաուի ըսաւ, որ ապահովական ուժերն ու ժողովրդային զօրախումբը կը շարունակեն ուժ կուտակել Խալիսիյա գաւառին մէջ, մասնաւորաբար Հուսէյպա շրջանին մէջ, որ կը գտնուի Ռամատիէն 7 քիլոմէթր դէպի արեւելք՝ առ ի պատրաստութիւն Ռամատիի եւ Անպարի շրջաններուն ՏԱՀԵՇ խմբաւորումէն ազատագրման:

Միւս կողմէ, ապահովական աղբիւր մը սեւուական «Օրագ» օրաթերթին յայտնեց, որ իրաքեան բանակի տեղեկահաւաքի բաժանմունքը հարցաքննած է Անպարի շրջանի զինուորական ղեկավարներէն ոմանք՝ մեկնելով «Էֆ.Պի.Այ.»-ի ՏԱՀԵՇ-ի ղեկավարներէն Ապու Սայեաֆի կնկան հետ կատարած հարցաքննութենէն ապահովուած այն տեղեկութեան վրայ, թէ Անպարի զինուորական ղեկավարներէն ոմանք գործակցած են ՏԱՀԵՇ-ի հետ, ինչ որ դիւրացուցած է

Ռամատիի շրջանի գրառումը՝ նշելով, որ հետաքննությունները ցոյց տուած են, որ այդ ղեկավարներէն երկուքը ՏԱՀԵՇ-ի հետ կը գործակցին:

Յիշեցնենք, որ ամերիկեան մասնայատուկ ուժեր Սուրիոյ մէջ գործողութիւն մը կատարելով սպաննած էին Ապու Սայեաֆը եւ անոր կինը գերեվարելով փոխադրած Իրաք:

Աղբիւրը «Օքագ»-ին յայտնած է, որ Ապու Սայեաֆի կինը ամերիկացի հետաքննիչներուն բազմաթիւ տեղեկութիւններ փոխանցած է իրաքեան զինուորական ղեկավարութեան վերաբերեալ, ինչ որ կրնայ փոխել Իրաքի մէջ քաղաքական ու զինուորական զարգացումներու ընթացքը:

«Ամերիկացիներուն Հետ Հիւսիսային Սուրիոյ Մէջ Ապահովական Գօտի Ստեղծելու Շուրջ Համաձայնութիւն Գոյութիւն Չունի» Կ'ըսէ Պիլկիչ



Թուրքիոյ արտաքին գործոց նախարարութեան բանբեր Թանժու Պիլկիչ «Շարք Աուսաթ» օրաթերթին յայտնեց. «Ամերիկացիներուն հետ հիւսիսային Սուրիոյ մէջ ապահովական գօտի ստեղծելու շուրջ համաձայնութիւն գոյութիւն չունի»՝ աւելցնելով, որ իր երկիրը կ'աջակցի այդպիսի քայլի մը գաղափարին:

Պիլկիչ նշեց, որ ամերիկացիներուն հետ գոյացած համաձայնութիւնը կը վերաբերի սուրիական ընդդիմադիր ուժերուն՝ անոնց մարզումի աւարտէն եւ Սուրիա մուտք գործելէն ետք, օդային պաշտպանութիւն տրամադրել, որպէսզի Սուրիոյ բանակին կամ ծայրայեղական խմբաւորումներուն առջեւ խոցելի չըլլան:

«Մարզումի ծրագիրը Թուրքիոյ մէջ իսկապէս սկսաւ», ըսաւ ան, սակայն մերժեց այդ ծրագիրին հետեւողներուն թիւը նշել: «Ամերիկացիներուն հետ համաձայնութիւն գոյացաւ մարզումի եւ զինումի հարցին շուրջ», ընդգծեց Պիլկիչ:

Միւս կողմէ, Սուրիոյ արտաքին գործոց փոխնախարար Ֆայսալ Մքրտատ հակադարձելով Թուրքիոյ արտաքին գործոց նախարար Մելուր Չաուշօղլուի սուրիական ընդդիմութիւնը մարզելու, զինելու եւ անոր օդային պաշտպանութիւն տրամադրելու յայտարարութեան, ըսաւ, որ որեւէ երկիր, որ կը մտածէ ահաբեկչական խմբաւորումներուն աջակցութիւն տրամադրելու մասին, Սուրիոյ դէմ նախայարձակի կացութեան մէջ կը յայտնուի:

«Յայտարարութիւնները անգամ մը եւս կը բացայայտեն այդ ահաբեկչական խմբաւորումներուն ուղղակի ֆինանսաւորում եւ զէնքի մատակարարում տրամադրելու թրքական մտադրութիւնները», ըսաւ ան՝ աւելցնելով, որ այդ յայտարարութիւնները ցոյց կու տան տագնապը երկարաձգելու եւ յաւելեալ անմեղ զոհեր ու քանդում պատճառելու մտադրութիւնները:

www.aztagdaily.com



ՀԱՂՈՐԴԱԳՐՈՒԹԻՒՆ

Միրելի Քուէթահայեր,

Ինչպէս տեղեակ պահուած էք, Քուէթի Սբ. Վարդանանց եկեղեցոյ տագնապը արդէն հասած է իր վերջին հանգրուանին, ուր վերջնականապէս պիտի ծրագրուի համայնքը սեփական եկեղեցիով օժտելու գործընթացը:

Նկատի ունենալով որ կը գտնուինք ո՛չ միայն պատմական, այլեւ՝ լուրջ պատասխանատուութեամբ յատկանշուած ժամանակաշրջանի մը մէջ, ուր պիտի որոշուի մեր եկեղեցոյ ճակատագիրը, անհրաժեշտ է ուժերու ծայրահեղ կեդրոնացում, հարցի մանրակրկիտ, բազմակողմանի եւ խորաթափանց քննարկում եւ հաշուարկուած մօտեցում իւրաքանչիւր քայլի:


Ուստի, այսպիսի ճակատագրական հարցի մը նկատմամբ, արագ, ուսումնասիրուած եւ համակարգուած որոշումներ ծրագրելու համար, Քուէթի Ազգային Երեսփոխանական Ժողովն ու Ազգային Վարչութիւնը, իրենց համատեղ նիստին մէջ յառաջացուցին «Եկեղեցոյ Հիմնախնդրի Գործադիր Մարմին»ը, որ գլխաւորութեամբ թեմիս Առաջնորդ Գերպ. Տ. Մասիս Ծ. Վրդ. Զօպույեանի, պիտի զբաղի բացառապէս այս հարցով եւ համարատու է Երեսփոխանական Ժողովին:

Արդ՝ Կ'ակընկալենք ձեր ամբողջական զօրակցութիւնը յիշեալ մարմնին եւ անոր ընդմէջէն մեր ազգային օրէնսդրական եւ գործադիր կառոյցներուն: Բոլոր առաջարկները այս գծով Ազգային Վարչութեան խողովակով, նկատի կ'առնուին ըստ նպատակայարմարութեան:

Դիւան
Երեսփոխանական
Ժողովի

ԱՆՆՄԱՂԱՐԶ

Վատիկանի Արխիվները Կը Լուսաբանեն Հայոց Ցեղասպանութիւնը



Նախքան թեւակոխելը սոյն տարեթիւին՝ համատարած համոզում էր, որ անսպասելի զարգացումներ պիտի ըլլան Հայոց ցեղասպանութեան խնդրին շուրջ: Սակայն ի դէմ այս ընդհանուր համոզումին՝ քիչեր միայն կը պատկերացնէին այդ զարգացումները: Քանի որ Հայաստանի Հանրապետութիւնը

ազգային խնդրի վերածած է Ցեղասպանութեան միջազգային գետնի վրայ ճանաչումը, բնականաբար պիտի մշակուէր միջպետական որոշ ռազմավարութիւն: Բայց հաւանաբար շատ քիչեր միայն պիտի կարենային մտաբերել, թէ կաթողիկէ դաւանանքի պետը՝ Հռոմի պապը եւս բերէ իր ներդրումը: Արդարեւ, Ֆրանչիսկոս պապը 12 ապրիլին Սուրբ Պետրոս տաճարին մէջ յատուկ արարողութիւնով մը պիտի յիշատակէ 1915-ի զոհերը:

Մինչ այդ Վատիկանի արխիվներուն մէջ մօտաւորապէս հարիւր տարիէ ի վեր մոռացութեան մատնուած նիւթերն ալ կրկին լոյս աշխարհ կու գան՝ շնորհիւ այս եկեղեցւոյ նախաձեռնութեան: «Լա Սիվիլթա Կաթօլիկա» պարբերականի մէջ հրատարակուած փաստաթուղթերը կը վկայեն Վատիկանի՝ Հայոց ցեղասպանութեան գործադրուած օրերուն կատարուած դիւանագիտական նախաձեռնութիւնները եւ օգնութեան աշխատութիւնները: Հայր Ճորճ Հանրի Ռայսընի կողմէ պատրաստուած եւ 21 մարտին հրատարակուած են այս նիւթով փաստաթուղթեր պարունակող չորս հատորներ: Արխիվի ամբողջութիւնը հրատարակուած պիտի ըլլայ մարտ ամսու վերջերուն: Փաստաթուղթերը կը պատկանէին Արեւելեան եկեղեցիներու սենաթի արխիվներուն: Անոնց մէջ կը հանդիպինք Հռոմի պապերուն՝ օսմանեան սուլթաններուն դրկած նամակներու, Վատիկանի արտաքին գործոց ներկայացուցչութեան եւ եկեղեցւոյ այլ վարչական կազմերուն մասին փաստաթուղթերու, միսիոնարներու տեղեկագրերու, հայոց պատրիարքներէն եւ այլ հոգեւորականներէն եկած նամակներու եւ եկեղեցի հասած վկայութիւններու:

Այս փաստաթուղթերէն շատեր առաջին անգամ է, որ կը հրատարակուին: Անոնց մէջ ուշագրաւ է Պենետիկտոս ԺԵ-ի՝ օսմանեան սուլթան Ռեշատին դրկած երկու նամակները: 10 սեպտեմբեր 1915 թուակիր նամակին մէջ պապը կը պահանջէ, որ սուլթանը դիրք բռնէ հայոց ուղղուած բռնութեան դէմ: Իսկ 12 մարտ 1918 թուակիր

նամակին մէջ դիրութիւններ կը պահանջուին հայոց ի նպաստ օգնութեան գործադրման համար:

Պարբերականին համաձայն, այս նամակները կ'ապացուցեն, թէ Վատիկան չէզոք չէ մնացած կոտորածներուն դէմ, այլ աշխուժ աշխատութիւն տարած է դրութիւնը բարելաւելու համար: Տակաւին կը պնդուի, որ Պենետիկտոս պապը այդ շրջանին միակ քաղաքական եւ հոգեւոր պետն էր, որ այս զանգուածային յանցագործութեան դէմ կը բողոքէր:

Վատիկանի դիւանագիտական նախաձեռնութիւնները այսքանով չեն սահմանուած: Կաթողիկէ եկեղեցին 1917-ին Ճեմալ փաշային կողմէ Սուրիոյ մէջ մահապատիժի դատապարտուած 60 հայերու ազատ արձակման համար միջնորդութիւն ըրած է: Վատիկան 1921-ին կարտինալ Փիէթրօ Գասպարի միջոցով տեսակցած է Մուսթաֆա Քեմալի հետ եւ պահանջած՝ ցեղասպանութենէն փրկուած քրիստոնէաներու կեանքի եւ ինչքերու անվտանգութեան պահպանումը:

Հրապարակուած փաստաթուղթերով յայտնի կը դառնայ, թէ Վատիկան, բացի դիւանագիտական միջամտութիւններէ, գործադրած է նաեւ Յեղասպանութենէն փրկուածներու ի նպաստ օգնութեան աշխատանքներ: Պարբերականը կը պնդէ, որ բացի Կարմիր խաչէն եւ Մերձաւոր Արեւելքի օգնութեան կազմակերպութենէն, արեւմտեան որեւէ մարդասիրական կազմակերպութիւն հայոց օգնութեան չէ փութացած: Մինչ Վատիկան հայ որբուհիները պատասպարած է Հռոմի մօտակայ Քասսել Կանտոլֆօ ուղղափառ եկեղեցւոյ որբանոցին մէջ:

1887-1904 թուականներուն միջեւ Պոլսոյ մէջ պաշտօնավարած Ակուստօ արք. Պոնթիի Վատիկան ուղարկած տեղեկագիրներն ալ կարելոր փաստաթուղթերէն կը համարուին: Ան ԺԹ. դարու վերջերուն կարելորագոյն օրակարգը հանդիսացող հայկական խնդրին եւրոպացիներու կողմէ օր ըստ օրէ մոռացութեան մատնուիլը կը բացատրէ անոնց «ի գին ամէն ինչի Օսմանեան կայսրութեան ամբողջութիւնը պահպանելու մարմաջ»-ին: Պոնթի կ'ըսէ, որ Ֆրանսա մեծ ներդրումներ ունեցած է կայսրութենէն ներս, այդ պատճառով այս դիրքը կը պահէ: Ռուսիա իր հեռաւոր Արեւելքի ռազմավարութիւններուն համար Թուրքիոյ հետ յարաբերութիւններուն մէջ վերապահ կը մնայ: Գերմանիոյ նիւթական շահերը կը պահանջեն, որ թուրքերու եւ յոյներու միջեւ պատերազմը շարունակուի, իսկ Անգլիա շատ կարելոր քաղաքական ակնկալութիւններ ունի:

Բացի վերեւ նշուած հոգեհանգստեան արարողութենէն, անուանի երգիչ Շարլ Ազնաւուր ալ համերգ մը պիտի ունենայ Վատիկանի մէջ:

ԷՄԻՔ ՃԱՆ ՏԱՂԼՕՂԼՈՒ

ԱԿՆԱՐԿ

**Առաւել Հգօր Հայաստանի Հանրապետութեան Համար
(Հայաստանի Ա. Հանրապետութեան Հիմնադրութեան 97-
Ամեակին Առիթով)**

Երեք տարի ետք հայկական աշխարհը պիտի նշէ Հայաստանի Ա. Հանրապետութեան հիմնադրութեան 100-ամեակը: Թուականը ինքնին կը պարտադրէ խորհրդածել Ցեղասպանութեան հետեւանքներու յաղթահարման մեր ընդհանուր ընկալումի նորօրեայ հասկացողութիւններուն մասին:



Հայոց ցեղասպանութեան 100-ամեակի շրջադարձային գլխաւոր կէտը ճանաչումէն հատուցուման պահանջի անցումն էր. այլ խօսքով՝ հայ ժողովուրդի բոլոր իրաւունքներու ճանաչման պահանջատիրական փուլի յայտարարութիւնը: Յունուար 29-ին որդեգրուած Համահայկական

հռչակագիրը կարեւորութեամբ կ'ընդգծէր «(Հռչակագիրը կ'արտայայտէ Հայաստանի եւ հայ ժողովուրդի միասնական կամքը՝ Հայոց ցեղասպանութեան փաստի համաշխարհային ճանաչման հասնելու եւ Ցեղասպանութեան հետեւանքներու յաղթահարման հարցին մէջ, որուն համար կը մշակէ իրաւական պահանջներու թղթածրար՝ դիտելով զայն անհատական, համայնքային եւ համազգային իրաւունքներու եւ օրինական շահերու վերականգնման գործընթացի մեկնարկ»:


Տրուած ըլլալով, որ հռչակագիրը կը փոխանցէ Հայոց ցեղասպանութեան 100-րդ տարելիցին նուիրուած նախաձեռնութիւնները համակարգող պետական յանձնաժողովի, համախորհուրդ սփիւռքի մէջ գործող տարածաշրջանային յանձնախումբերու ներկայացուցիչներու ճամբով արտայայտուած հայ ժողովուրդին միասնական կամքը, եւ կը յենի 1990-ի օգոստոսի 23-ի՝ Հայաստանի անկախութեան մասին հռչակագրի եւ Հայաստանի Հանրապետութեան սահմանադրութեան վրայ, այս հիմնադրոյթը կամ իրաւունքներու վերականգնման պահանջատիրութիւնը կը պետականանայ այս ձեւով:

Մայիս 28-ով կերտուած հանրապետութեան այսօրուան ժառանգորդ պետութիւնը կը ստանձնէ հայ ժողովուրդի համազգային իրաւունքներու բարձրացման եւ հետապնդման գործընթացը: Այս մէկը կարեւորագոյն իրագործումներէն կարելի է համարել 100-ամեակին, որ սերտօրէն կ'առնչուի նաեւ Մայիս 28-եան ժամանակակից խորհուրդին:

Իրաւատիրական աշխատանքներու ստանձումը կ'ենթադրէ՝ հգօր իրավիճակ, պետական պատրաստուածութեան բարձր մակարդակ, իրաւաբանական մասնագիտութիւն,

դիւանագիտական արուեստ եւ քաղաքական ակներեւ հմտութիւն, եւ այս բոլորին համար՝ համահայկական մարդուժ համախմբելու կարողութիւն:

Յեղասպանութեան 100-ամեակը ազգի մարդուժը համախմբելու առումով նշանակալից առիթ հանդիսացաւ, որպէսզի պետական տանիքի տակ համախմբուին՝ հայկական երկու պետութիւնները, եկեղեցիները, կուսակցութիւնները, միութիւններն ու ամենաազդեցիկ կազմակերպութիւնները: Այս համախմբութեանը պահելու, կառուցակարգելու եւ նպատակուղղուած աշխատանքը շարունակելու համար անհրաժեշտ է առաջին հանրապետութեան իրաւական եւ իրողական ժառանգորդ այսօրուան հանրապետութեան հզօրացումը: դարձեալ յղում կատարենք հռչակագրին եւ Մայիս 28-ի ժամանակակից խորհուրդին հետ առնչենք հռչակագրին հետեւալ բաժինը.



«(Հռչակագիրը) կոչ կ'ուղղէ հայորդիներու գալիք սերունդներուն՝ հայրենասէր, գիտակից եւ ուսեալ կեցուածքով պաշտպան կանգնիլ հայրենի սրբազան ժառանգութեան, աննահանջ պայքարով ծառայել, յանուն՝ առաւել հզօր հայրենիքի՝ ազատ եւ ժողովրդավար Հայաստանի Հանրապետութեան»:

Առաւել հզօր, ազատ եւ ժողովրդավար հայաստանի հանրապետութիւն ստեղծելը մեր բոլորին պարտականութիւնն է: Հռչակագիրը համահայկական բնորոշիչ ունի եւ այդ բնորոշումին կը ներառուի համայն հայութիւնը:

Հայաստանի Հանրապետութեան վերաբերող իւրաքանչիւր իրագործումին մէջ իւրաքանչիւր հայ իր ներդրումը զգալու համար աւելի քան անհրաժեշտ է մասնակցութիւնը: Հեռակայ զգացական հայրենասիրութեան ժամանակները անցած են վաղուց եւ գործնապէս տեղւոյն մասնակցութիւնն է միայն, որ կրնայ աւանդ ապահովել հայրենակերտման եւ պետականաշինութեան առաջնային խնդրին:

Հայաստանի Հանրապետութեան հզօրացումը իբրեւ առաջադրանք բանաձեւուած է Յեղասպանութեան վերաբերող Համահայկական հռչակագրին մէջ: Այս կը նշանակէ նաեւ, որ մեր իրաւունքներու վերականգնման նպատակին զուգահեռ, մեր համահայկական նպատակն է այսօրուան հանրապետութեան՝ Մայիս 28-ով փրկուած ու կերտուած հանրապետութեան հզօրացումը:

Այս կը նշանակէ նաեւ, որ Յեղասպանութեան հետեւանքներու յաղթահարման մեր հայեցակարգի ընկալումը կ'ենթադրէ հայրենասիրական զգացողականութիւնը փոխարինել հայրենատիրական գործնական աշխատանքով: Այո՛, յանուն առաւել հզօր, ազատ եւ ժողովրդավար Հայաստանի Հանրապետութեան կայացման համար:

«Ա»

ԿՆՈՋԱԿԱՆ

ԻՆՉՊԷ՛Ս ՋԻՂԵՐՈՒՆ ՏԷՐԸ ԸԼԼԱՄ

Հարցեր տան մեջ, հարցեր գործի մեջ ու արդեն ջիղերը կը լարուին, եւ մեր գայրոյթը կը պարպենք մեր գաւկին, գործընկերոջ կամ նոյնիսկ անձանօթի մը վրայ:



Մեր գայրոյթը յաճախ տեղի չ'ըլլար եւ եթէ քիչ մը մենք մեզ զսպած ըլլայինք ո՛չ մենք այդ անյարմար կացութեան մեջ կը դրուէինք, եւ ոչ ալ դիմացինը կը նեղացնէինք: Անշուշտ պիտի ըսենք, որ այս մէկը մեր ձեռքը չէ, ինքնագսպումը դիւրին բան չէ եւ այլն... Սակայն ամէն բան վարժութեան հետ կապուած է, եւ, մասնագետներու կարծիքով, կարգ մը հնարքներ կ'օգնեն, որպէսզի ձերբագատինք գայրոյթի պոռթկումներէն, եթէ ոչ հարիւր տոկոսով, առնուազն կարելոր համեմատութեամբ մը:

1-Նախ եւ առաջ պէտք է սորվինք համեմատութեան սկզբունքը: Վարժուինք իրապաշտ ձեռով դիտել հարցերը եւ հարցերը դնենք իրենց ճիշդ չափերուն մեջ: Պզտիկ հոգերը չմեծցնենք եւ ոչ ալ պէտք եղածէն աւելի արժէք տանք անոնց, երբ զգանք գայրոյթի առաջին ազդանշանները մենք մեզի 5 վայրկեան տանք եւ նախքան «պայթիլը», խորունկ շունչ առնենք, քալենք, գաւաթ մը ջուր խմենք եւ մենք մեզի հարց տանք՝ արդեօք հարցը այդքան ալ մտահոգի՞չ է, արդեօք պոռթկումս հարցը պիտի լուծէ՞. քիչ-քիչ պոռթկումը կը նահանջէ տեղը տալով տրամաբանական մտածումին:



2-Ուշադիր ըլլանք մեր առողջութեան, ուտելիքներուն, հեռու մնանք հանդարտեցուցիչներէն, կարելորութիւն տանք քունին, որ պիտի կազդուրէ մեզ, որպէսզի դիմագրաւենք օրուան դժուարութիւնները:



3-Մարզանք ընենք. քալելը, հեծիկ քշելը, լողը կը պակսեցնեն գերձնշուածութիւնը, լարուածութիւնը: Շաբաթը երկու անգամ մարզանք ընելով ո՛չ միայն կը կանոնաւորենք արեան շրջագայութիւնը, այլ կ'ապահովենք մեր ներքին խաղաղութիւնը:

4-Վերջապէս մտածենք «սթրէչինկ»ի, եոկայի եւ մարձումներու մասին: Շատերու պարագային բարեգործ դեր կը կատարէ նաեւ երաժշտութիւնը:

Ահա այսպէս՝ զանազան միջոցներով մշակենք մեր ներքին խաղաղութիւնն ու հաւասարակշռութիւնը, որպէսզի պակսին գայրոյթի պոռթկումները:

ՄԱՆՈՒՎՆԵՐԸ ՊԱՏԿԵՐԱՍՓԻՒՌԷՆ ՀԵՌՈՒ ՊԱՀԵԼ



Ամերիկեան մանկաբուժական հիմնարկի մէկ տեղեկագրութեան համաձայն, երկու տարեկան եւ վար մանուկները պատկերասփիւռին առջեւ պէտք չէ նստեցնել:

Տեղեկագրութեան համաձայն, այդ տարիքի մանուկները բան չեն հասկնար իրենց տեսածէն, երկրորդ՝ անոնք ուշ լեզու կ'ելլեն: Արդարեւ, իրենց

մանուկները պաստառի առջեւ նստեցնող ծնողները նուազ առիթ ունին անոնց հետ խօսելու եւ հաղորդակցելու:

Տեղեկագրութիւնը կը թելադրէ այդ տարիքի մանուկներուն ձեռքը տալ իրենց տարիքին համապատասխան խաղալիքներ, որոնք աւելի օգտակար կրնան ըլլալ անոնց մտային աճումին: Հետեւաբար նախընտրելի է քիչ մըն ալ սպասել՝ նախքան մանուկները պատկերասփիւռին յանձնելը:

ՅԱՅՏԱՐԱՐՈՒԹԻՒՆ

Քուէյթի Ազգային վարժարանը կարիքը ունի մանկապարտէզի ուսուցչուհիներու: Դիմորդները պէտք է ունենան.-

1-Համալսարանական բարձրագոյն կրթութիւն՝ նախընտրաբար մանկավարժութիւն:

2-Նուազագոյնը երեք տարուայ փորձառութիւն:

3-Ունենալ երգի, պարի, նուագի կամ նկարչութեան հմտութիւններ: Դիմումնագրերը փոխանցել վարժարանի տնօրէնութեան՝ մինչեւ 10 Յունիս 2015

Ծանօթ: Քուէյթէն դուրս գտնուող դիմորդները պէտք է ունենան Հայաստանի քաղաքացիութիւն:

Քուէյթի Ազգային վարժարանի տնօրէնութիւն



**ԱՌԱՋՆՈՐԴԱՐԱՆ ՀԱՅՈՑ
ԲՈՒԷՅԹԻ ԹԵՄԻՆ**

P.O.BOX 8157, Salmiyeh 22052 – KUWAIT – Tel:25614392, e-mail: prelacy@armenianprelacykw.org



**ՀԱՆՐԱՊԵՏԱԿԱՆ ՄԱՂԹԱՆՔ
ԵՒ
ԴՐՕՇԱԿԻ ՕՐՀՆՈՒԹԻՒՆ
ՀԱՅԱՍՏԱՆԻ ՀԱՆՐԱՊԵՏՈՒԹԵԱՆ
ՀԻՄՆԱԴՐՈՒԹԵԱՆ
ՄԱՅԻՍ 28-ի
97-րդ**

ՏԱՐԵԴԱՐՁԻՆ ԱՌԻԹՈՎ

Տեղի կ'ունենայ յառաջիկայ Ուրբաթ, 29 Մայիս 2015-ի առաւօտեան սուրբ պատարագի ընթացքին, Սրբոց Վարդանանց Եկեղեցոյս մէջ:

Յաւարտ սուրբ պատարագի՝
Նախագահութեամբ թեմիս բարեջան առաջնորդ՝
ԳԵՐՊ. ՏԷՐ ՄԱՍԻՍ Ծ. ՎՐԴ. ԶՕՊՈՒՅԵԱՆԻ

պիսի կատարուի Հոգեհանգստեան Պաշտօն
Դարաքիլիսի, Բաշ Ապարանի եւ Սարդարապատի

հերոսներու հոգիներուն համար, որոնք իրենց կեանքը զոհաբերեցին
Հայաստանի Հանրապետութեան Հիմնադրութեան, ինչպէս նաեւ
Ազատ եւ Անկախ Հայրենիքի կերտումին:

Այսու սիրով կը հրաւիրենք բոլոր հայորդիները, ներկայ գտնուելու
վերոյիշեալ կրօնական արարողութեանց, մեծարելու խնկելի յիշատակը
բոլոր այն հերոսներուն եւ մարտիրոսներուն, որոնց գերագոյն
զոհաբերութեամբ իրագործուեցաւ մեր դարերու երազանքը:

Նոյնպէս վերանորոգելու մեր ուխտը՝
Միացեալ, Ազատ եւ Անկախ Հայաստանի կերտման համար:

26 Մայիս 2015
Բոնէթ

**ԴԻԱՆ ԱԶԳԱՅԻՆ
ԱՌԱՋՆՈՐԴԱՐԱՆԻ**